

## Ministerstwo požadane stejišća wočaknje

**Podstupim** (SN/at). Minimalna ličba dwanaće šulerjow na rěčnu skupinu we wučbje serbsčiny abo Witaj-wučbje w Braniborskej je definitywje z blida. To wobkrući nowinski rěčnik braniborskeho ministerstwa za kublanje, młodžinu a sport Ralph Kotsch našemu wječornikej. Referatna nawodnica dr. Katrin Düring bě to na posedženju Rady za naležnosće Serbow při Krajnym sejmje Braniborskeje wčera w Podstupimje wozjewiła. Hinašu ličbu pak njeje mjenowala, kaž wobdźělnicy rozprawjeja. Předsyda Domowiny Dawid Statnik wobkrući knjeni Düring jara taktiske wustupowanje, byrnjež so na položanju cyłkownje ničo njezměniło. „Ze serbskeje strony je wšitko prajene, nětko měło so ministerstwo k tomu wuprajić“, rjekny wón na naprašowanje. Ministerstwo wočaknje zapodaće požadanych stejišćow k naćiskej noweho serbskeho šulskeho postajenja, prjedy hač dale postupuje. Termin je 7. apryl.

Na posedženju je so wukopalo, zo zda so ministerstwo runje tak nastupajo zarjadniski předpis za bilingwalnu wučbu a nowe postajenje za gymnazialny horni schodženk (GOSTV) wo serbskich wobstejnosćach špatnje informowane. „Pola GOSTV wopokazaja so přichodnje dwaj wukonowej kursaj a jenož jedna cuza rěč jako wulki problem,“ zwěsći člonka serbskeje rady Angela Šurmanowa, dokelž by za Delnjoserbski gymnazij druge rjadowanje jako specifiska šula trěbne było. Wona njerozumi, wuwučowanje cuzych rěčow na jednu wobmjezować, přetož Němska so přeco jako „tajki europski kraj“ předstaja. W zwisku z bilingwalnej wučbu bychu serbscy wučerjo rady swoje nazhonjenja podali. Ministerstwo pak je so na druhe kubłanišćo, pječa z Prignitza, zepěrało, rozloži Šurmanowa.

Na protesće do wuradžowanja kubłanskeho wuběrka jutře wot 12.30 hodž. před twarjenjom krajneho sejma w Podstupimje chce staršiska iniciatiwa ministerej Günterej Baasce (SPD) wosobinske listy staršich, dotal nimale 6 000 podpismow online-peticije a 80 rysowankow džěći přepodać.